

ARGENTINARAT 1992-AN IHES EGIN ZUEN 161 MILIOIREN DESBIDERATZEAK EGIN ETA GERO

## Boucheron Frantziako Justiziaren eskuko da atzotik

Jean-Michel Boucheron Angoulemako auzapez eta diputatu ohia Parisera iritsi zen atzo, Argentinak estraditu ostean. Herri hartan bost urtez ihesean egon zen, Frantzian, bere hautetsi karguen garaian, egindako hainbat diru desbideratzetan akusatua izan ondoren.

Allande Sokarros / Baiona

ATZO eguerdiko hamabiak baino apur bat lehentxeago lurra hartu zuen, Roissyko aireportuan, Buenos Aiestik zetorren Air Franceko hegazkinak. Gelditu zen tokian Poliziako furgoneta bat zain zegoen eta bertara igo zen berehala Jean-Michel Boucheron. Ibilgailu honek eta jagolegoko besteek Bobignyko (Seine-Saint-Denis) auzitegirako bidea hartu zuten, han bertan Boucheroni iragarri behar baitzioten zein diren bere aurkako auzibideak. Datorren ostiralean, berriz, Parisko zigor auzitegiak erabakiko du preso egongo denez epaitu aurretik. Anartean, Fleury-Merogiseko espetxean egongo dela aipatzen zen atzo.

Angoulemako auzapez sozialista ohiari gutxienez bi auzibide gainean jarriko dizkiote, hots bata alkarte kargu horretan zelarik egindako diru desbideraketengatik eta beste bat Bordeleko auzitegiak irekitakoa dirulaguntza susmagarri eta fakturazio faltsu batzuegatik. Lehen kontuari dagokionez, behin eta berriro aipatuta izan den zifrea da Jean-Michel Boucheronen 164 milioi libera inguruko (4.100 milioi pezeta) dirutza bat desbideratu zuela Angoulema auzapez egon zen garaian, 1977 eta 1989. urteen bitartean.

Diru desbideratze hauek udalak agindutako merkato publiko andana batean egindako fakturazio gehiegizkoen bitartez gauzatuak izan ziren. Esaterako, hiriaren zabor erretegia eraikiarazi zelarik, 2,5 milioi libera gehiegi ordaindua izan zela hauteman



Jean Michel Boucheron Angoulemeko auzapez ohia Buenos Airesen atxilotu zutenean.

AFP

zen gerorago eta uren sanokuntzarako tokia altxatu zelarik, berriz, 500.000 libera haboro gas-tatua izan zen. Ororen buru, bere auzapez kargua galdu zuelarik 1989ko hauteskundeetan, eta eskuineko zerrenda agintera iritsi zelarik, Angoulemako udalaren kuxetan 164 milioi liberako zuloa eta 1,4 miliar liberako zorrak aurkitu ziren.

**Gobernuan egon zen hilabete batez** • Jean-Michel Boucheronen iruzurrak agerian ezartzen gehienik ahaletzen zuena, Marcel Dominici Angoulemako langa-

betuen elkarteko presidentea izan zen, berak baitzituen, 1986. urteaz geroztik, lehendabiziko denuntziak egin eta azterketa sakonak burutu udal kudeantzen inguruan. Susmoak gero eta nabarmenagoak azaldu arren, Jean-Michel Boucheron Lurralde elkargoetako estatu idazkari izendatua izan zen 1988an baina gobernu kargu honetan ez zuen hilabete bat baizik iraun. Azken batez, Argentinarat ihes egin zuen 1992ko otsailean, auzipetuta izateko unean zelarik. Buenos Airesen, berriz, jattetxe frantziar bat ireki zuen.

Alabaina, Frantziako Justiziak lau urterako espetxe zigor baterat kondenatu zuen 1994. urtean eta honen ostean nazioarteko atxiloteta agindu bat zabaldu zuen eta 1995ko agorriaren 17an Interpoleko poliziek arrastatu zuten. Urte bereko irailaren 8an, aske utzia izan zen, ostera, 50.000 dolarreko fidantza bat ordaindu eta gero, baina Frantziarako estradizio prozesu bat bidean jarria zen ordurako. Azkenean, 1996ko abenduan, Buenos Airesko auzitegiak ontzat hartzen zuen Frantziak egindako estradizio eskaera. X

## Entzutegi Nazionalak gaur goizean esango du Condek espetxera itzuli behar duenez

■ Ez duela Espainiatik ihes egiteko inolako asmorik esan du bankariak

Efe / Madril

JESUS SANTOS Entzutegi Nazionalako fiskalak Mario Conde espetxean sartzea eskatu zuen atzo, *Argentina Trust* auzian jasotako zigorra dela eta Banestoko lehendakari ohiak Espainiatik ihes egiteko arriskua dagoela-koan. Angeles Murillo buru duen epaimahaiak gaur goizeko 11etan jakinaraziko dio Conderi kartzelara eramaten duen ala ez.

Conde Entzutegi Nazionalan izan zen atzo goizean, bi helbururekin. Batetik, Banestoko presidenteak errekurtsioa aurkeztu zuen joan den astean sei urteko zigorra ezarri zion *Argentina Trust*

auziko epaiaren aurka. Bestetik, Condek aukera izan zuen fiskalak eskatutako giltzaperatzearen aurkako argudioak emateko fiskalaren beraren eta Murillo epailearen aurrean.

Oporretan dagoen Ignacio Gordilloren ordezkari Jesus Santos fiskala izan zen Conderen espetxe-ratzea eskatu zuena. Santosek gogorarazi zuen dagoeneko Conde kondenatuta dagoela eta *Banesto* auzian 44 urteko espetxe zigor eskaerari aurre egin behar harko diola hurrengo neguan. Banestoko presidente izandakoak Espainiatik alde egiteko eta atzerrian ezkutatutik bizitzeko adina baliabide badituela ziur-

tzat jo zuen fiskalak. Espetxean ez sartzekotan, fiskalak bankaria kontrolpean edukitzeko beste zenbait neurri proposatu zituen, hala nola, fidantza «nabarmen» bat ordaintzea, aldian behin auzitegian agertu beharra edo beti auzitegiak aurki dezakeen leku batean egotea.

Bere defentsan, Condek ziurtatu zuen orain arte beti jarraitu dituela justiziaren aginduak eta bere «ohoreagatik» zin egin zuen ez duela Espainiatik ihes egingo. *Banesto* auziagatik dagoeneko pasaportea kendu diotela eta fidantza ordaindu behar izan duela gogoratu zuen.

Murillo epaileak Conde espe-



Mario Conde.

SIMAL

txeratzea erabakiko balu, badaezpadako kartzeleratzean izango litzateke Auzitegi Gorenak errekurtsioari erantzuna eman arte. Gehienez hiru urte egon daiteke Conde badaezpadako kartzelan, epe horren bikoitzako zigorra ezarri baitiote. X

## Auzitegi Goreneko oraingo aretoa arduratuko da sekretuak desklasifikatzeaz

■ Apirilean onartuko du Gobernuak ezkutuko gaiei buruzko lege proiektua

Erredakzioa / Donostia

ESTATUKO sekretuak desklasifikatzen diren erabakiko duena administrazioaren arazoez arduratzen den Auzitegi Goreneko epaitegia izango da azkenean, atzo *El Mundo* eta *Abc* egunkariak zabaldu zutenez. PPren Gobernuarekin harreman ona duten bi egunkari hauen arabera, Estatuko Sekretuen Lege Organikoaren proiektua astelehenean amaitu zuten Defentsa, Justizia eta Lehendakaritzako ministerioek eta apirilean onartuko du Gobernuak.

Bezperan, *El Pais*ek argitaratu zuen Auzitegi Goreneko presidentea eta organu honetako beste bi epaile izango zirela azken unean sekretuen zabaltzeari buruzko erabakia hartuko zutenak. Antza denez, egunkari honek Defentsa Ministerioa zuen bere informazioaren iturri, baina sail honen iritzia ez dute aintzat hartu beste ministerioek. Jose Maria Michavila Gorteetiko Harremanetarako Estatu idazkariak onartu egin zuen eztabaidan zehar «desadostasunak» izan direla.

**CGPJren aholkuak jarraitu ditu Gobernuak** • Gainontzean, ustez Gobernuaren lege proiektua dena EGUNKARIAK atzo kaleratutako laburpenarekin bat egiten du. Hortaz, sekretuak hiru eratakoak izango dira —goi sekretuak, sekretuak eta konfidentzialak— eta Ministroen Kontseiluak erabakiko du zein gai ez den zabalduko. Sekretuak eta goi sekretuak 25 urtera desklasifikatuko dira automatikoki eta berdin egingo dute gai konfidentzialek artxibatu eta hamar urtera. Hala ere, epe hori amaitu baino lehen Gobernuak gai bat sekretupean ez egotea erabaki ahal izango du eta, aldi berean, epea luzatu ahal izango du horretarako arrazoiak dagoela iritziz badi. Proiektu honetan ez da aurrikusten sekretu ofizial baten berri ematen duen komunikabideari zigorrak ezartzea.

Era honetara, Gobernuak kontutan hartu ditu joan den azaroan Botere Judizialeko Kontseilu Nagusiak (CGPJ) egindako gomendioak. CGPJk hainbat eragozpen jarri zituen Gobernuak abuztuaren onartutako legegaiaren lehen testuari. Izan ere, aurreproiektu horrek zioen sekretuak 50 urtez gordeko zirela, Gobernuak izango zuela azken hitza gai baten desklasifikazioari buruz eta kazetariak isun handiak jasoko zituztela sekretuak zabaltzekotan. X